

#إسمعوا_من_المسيحيين_متسمعوش_عنهم (١)

الإنجيل منزلش على عيسى!

طبعًا السؤال الشائع هو:

فين الإنجيل اللي نزل على عيسى؟

أو فين الإنجيل اللي كتبه عيسى؟

عشان اجاب لازم الأول أوضّح حاجتين ..

الأولى:

إن معندناش حاجة اسمها [نزل] على عيسى ..

أنا مُتفهم إن الوحي في مجتمعنا مُنزل من فوق ..

بس في المسيحية مش كده ..

لكن عندنا ناس، الله استخدمهم (يعني اشتغل معاهم) ..

كانوا عايشين مع المسيح، شافوه وسمعوه ..

هُمّا تلاميذه (أو حواريه) اللي اتعلموا منه ..

اللي شافوه ده كتبوه، مش في أثناء حياة المسيح ..

لكن بدأوا يكتبوا بعد موته وقيامته (أو بعثه ورفعه بلغة المجتمع) ..

اللي كتبوه ده هو أجزاء متنقيّة من حياة المسيح وتعاليمه ..

وده ينقلني للحاجة الثانية:

[إنجيل] مش معناه كتاب أو سورة، ولا حتّى كُتب ..

لكن إنجيل كلمة أصلها يوناني ومعناها: خبر جِلو ..

الخبر الحلو ده هو إن الرب يسوع اتولّد ومات وقام ..

يعني الإنجيل ده مش كتاب نزل من السّما على عيسى ..

لكن عيسى شخصيًّا هو الإنجيل، هو الخبر الجِلو ..

الخبر الحلو ده ببساطة هو إن الله نزل وسطينا ..

مكتفاش إنه يبقى في السّما ويبعتلنا أوامر مكتوبة ..

لكن نزل وعاش وسطينا ومشي في أرضنا ..

ده مش كُفر مِننا، ولا تقليل من قامه وقيمة الله (حاشا) ..

لكن ده تعظيم وإجلال لله، سبحانه ..

لأن العظيم بيتعرف بتنازله مش بكبرياءه ..

اسمعوا من المسيحيين متسمعوش عنهم

ديفيد ويصا

وده أنا شرحته في هاشتاج:

#تجسد_الله_في_المفهوم_المسيحي_ببساطة

يعني إجابة سؤال: فين الإنجيل اللي نزل على عيسى؟

الإنجيل منزلش على عيسى، عيسى هو الإنجيل ..

الإنجيل مكتبوش عيسى، الإنجيل هو كتاب حياة عيسى!